



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tir\_yimiyim

tir yimiyim

TAPAK 8

Bengal nung BJP nungi mezüngbuba  
Chief Minister ji Suvendu asütsü

Cristiano Ronaldo-i  
otsü tasen yanglu



VOL. XXIII ISSUE NO. 205 (ADOK 205) DIMAPUR KÜPTOKNÜ (SATURDAY) MONUPII (MAY) 09, 2026 ₹ 5.00

## SBI Salary Package Account ajanga tajangzük aika angur

**Dimapur, May 8, 2026 (TYO):** May 8, 2026 nü Directorate of Information & Public Relations-i State Bank of India den yaritepa State Government Salary Package indang sentong ka agiogo.

Iba sentong nung shisalen sayurji Corporate Salary Relationship Manager, SBI Administrative Office, Jorhat Sonia Bhuyan liasü.

Lai sorkar mapa inyakertem atema SBI Salary Package Account indang temetetsü aser tajangzüktem indang lemsatep.

SBI Salary Package Account ya zero-balance account ka lir aser QAB ayutsü nüngdak mali. Customers-i free debit card angur aser iba nung annual charges kecha mali aser SBI ATMs nung unlimited free transactions süteter ta Sonia Bhuyan-i ashi.

Iba account nung free NEFT/RTGS transfers, demand drafts nung charges kecha mali aser locker rent nung 50% discount angur ta laisa ashi.

Iba package nung protection benefits kübok Personal Accidental Insurance (PAI) agütsür aser iba ya Rs 110 lakh tashi lir. Ano Rs 2.6 crore tashi Air Accidental Insurance aser Rs 10 lakh tashi term life insurance cover up agütsür ta Bhuyan-isa metetdaksü.

Maneni, rongdak mapang Rs 10 lakh education cover, Rs 10 lakh girl child marriage, Rs 10

lakh air ambulance cover, Rs 5 lakh imported medicine transport, nisung shia Rs 50,000 family transportation and ambulance aser plastic surgery mesüra burn cases atema Rs 10 lakh tashi agütsür. Ano, permanent total disability atema Rs 1 crore aser partial disability atema Rs 80 lakh agütsür.

SBI Salary Package Account kübok RuPay debit card ajanga airport lounge visits 12, 1-year OTT subscriptions (Amazon Prime/Zee5/SonyLIV), 3 months Swiggy One membership, aser annual health check-up khen agütsür. Talila tajangzüktem rongnung spa benefits, golf access, aser Rs 2 lakh purchase protection angur ta Bhuyan-isa metetdaksü.

Iba package nung telemsa pungu kübok financial aser lifestyle benefits agütsür-Rhodium (above ?2 lakh), Platinum (Rs 1-2 lakh), Diamond (Rs 50,000-Rs 1 lakh), Gold (Rs 25,000 - Rs 50,000), aser Silver (Rs 10,000-Rs 25,000) lir. Iba atema account nung registered nominee ka alitsüla aser tajangzüktem agütsü atema death certificate aser post-mortem report nüngdaksü.

Iba sensitisation session ta Fire and Emergency Services, Urban development, Municipal Affairs aser Veterinary & Animal Husbandry Service Directorate tem nunga agia liasü.

## Dimapur Police-i rakzükraakter 2 apu

**Dimapur, May 8, 2026 (TYO):** April 20, 2026 aonung Dimapur nung shishilembar ka dak tashiyim inyaka sen auyar aortem puogo ta Commissioner of Police, Dimapur-i sangdong ka nung metetdaksüogo.

April 20, 2026 aonung 7:00 ako meta Sematilla, Dimapur nung alir Ruhon Das-i Hongkong Market nung pa indang dokan shibanger kidangi aodang mejangjatetba nisung anati pa sülen anidak aser Murgipatti area nung apu ta East Police Station nung April 21 nü FIR ka benoka liasü.

Nisung ana jagi Das tashiyim agi DMC office leni anir ao aser pa amokmerena sen meshi. Iba mapang tenati pa indang mobile phone rakzük aser Google Pay password meshi aser Ghorapatti area nung aliba IOC Petrol Pump-i anir orr pa indang account nungi Rs. 6,000 agizük. Iba sülen pa City Tower area-i anir ao aser Vishal Mega Mart anasa pa yutsür tena jena ao ta FIR nung shia liasü.

Iba osang angashiba sülen East Police Station-i bushisüngdang tenzük aser tatalokba tesemi ao. Dimapur

Police-i IOC Petrol Pump aser tanga public tesemtem nung aliba CCTV footage repringdang temlung melema bilemba nisung ana noksa agizük field-level police units ajak dangi prokshi.

Dimapur Police-i osangtsüsang metetpela aser bushisüngdanga arur April 28, 2026 nü iba ken o nung tai tonglokja alir mezüngbuba nisung apu aser pa ya M. Stephen Yanthan ta jangjaogo.

Maneni, police-isa May 6, 2026 nü tanabuba nisung Chumbenthung Yanthan puogo aser tena dang asüngdangya asüba aser kulitem ngutetba agi tenati prangpong mesüra hadir kecha mamshi ta Commissioner of Police-isa metetdaksü.

Iba tatalokba sülen takoksa ajururi osangbener den sensaksemba ajanga Dimapur nung public kümzükä maliba aser law & order tensa asoshi tebilemstütem adoka liasü. Iba dak sendakba nung Dimapur Police-i ozüng alema inyakba ajak süoki ia bilema teinyaktsü tim inyaka arur aser public kümzükä ayutsü atema kanga meranga inyaker ta Commissioner of Police, Dimapur-isa metetdaksüogo.

## Assam Rifles-i Dimapur Airport ulushitsü atema ali agütsü



**Dimapur, May 8, 2026 (TYO):** Dimapur Airport nung Phase-I maparen inyaka aotsü atema Assam Rifles Training Centre and School (ARTC&S), 3rd Mile, Chümoukedima-i Airport Authority of India (AAI) nem ali agütsüogo.

May 8, 2026 nü Dimapur Airport, Chümoukedima nung Assam Rifles-i ali 18.8 acres agia aliba meyipa agütsü.

Nagaland sorkar aser Centre-i tiyongtsü ia inyakdangaka mapang talangka iba tebilemstü ya mekokteti aru aser iba ajanga airport expansion project

anendaka ayu. Tanü Dimapur Aiport nung joint execution programme ka ayonga agi aser iba nung AAI, Assam Rifles aser state sorkar ketdangsurtem aden.

Iba sentong nung Moa Pongen, APD, AAI, Dimapur Airport, Chumoukedima; Commandant KD Sharma, CO, No. 2 Bn, ARTC&S; Sentiwapang Aier NCS, Secretary, AIR Cell, Transport Department, Polan John, NCS Deputy Commissioner, Chumoukedima aser M. Ababe Ezung OSD, Transport Department nungera

aden. Parnok ajak külemi ARTC&S nung ali 18.8-acre repringdangtepa liasü aser iba sülen handing-over and taking-over process inyak.

Senden nungsa ketdangsurtemi Phase-II expansion plan atema ARTC&S ajanga atsünga agia aliba tanünga ali agütsütsü indang jembitepa liasü.

Ajisüaka tanünga tesemtem atema bangdakpur nungi tetuyubatem nüngdaksü ta senden nungsa mulungtepa jembi.

## Nagaland garitem nung tamaittsü zülü enoktsü memelar

**Dimapur, May 8, 2026 (TYO):** Nagaland sorkari nija mesüra sorkar garitem nung NGO indang slogans, signages, stickers aser tanga ozüngi memelaba identifiers sayuba noktanger.

Ministry of Road Transport and Highways-i Motor Vehicles Act, 1988 nung Section

96(2)(vi) aser Section 111(2)(e) nung tashi agüja aliba iba asoshi tetuyuba ka agütsüogo ta Commissioner and Secretary to the Government of Nagaland, Robert Longchari-i sangdong ka nung ashi.

Anungji iba sangdong agütsüba sülen anogo 45 tsüngda garitem

nung tamangba yimsü mesüra NGO-based slogans, signages, stickers aser identifiers ajak agientsüla ta pai metetdaksüogo.

Tashi mangartem Motor Vehicles Act and Rules nung lateta aliba ama temerenshi alitsü ta Commissioner and Secretary-isa ashi.

## ANCSU-i KSC nung girl's hostel tenzüktsü mapang züngzüktsür

**Kohima, May 8, 2026 (TYO):** Kohima Science College, Jotsoma (Autonomous) nung 100-bedded girls' hostel yanglu tenzüktsüla ta All Nagaland College Students' Union (ANCSU)-i state sorkar aser bangdakpurtem dang shiogo.

"Rural Electrification Corporation (REC) Limited ajanga iba mapatong atema Rs 3.53 crore CSR (Corporate Social Responsibility) fund agütsü saka sorkari iba senji amshia mapatong metenzükter. Iba ajanga tenla agütsüba company-i sen meyipa meshir" ta ANCSU president Kivika Yeptho-i ashi.

"Sorkar aser bangdak department-i iba CSR sen ya kümzükä meyutetra kaketshirtemi ola adoktsü. Iba sangdong agütsüba sülen hopta ka tsüngda mapa metenzükra onoki lungkak aittsü" ta ANCSU president-isa ashi.

Kohima Science College nung girls' hostel yanglutsüba ya Investment and Development Authority of Nagaland (IDAN)-i October 2022 nung REC Limited

dangi CSR funding kübok Rs 3.53 crore nüngdaka asüngdang ta ANCSU-i ashi.

Iba mapatong ya March 2023 nung mulunga agizük aser kasa küm April ita first instalment Rs 1.5 crore agütsü. Ajisüaka, IDAN-i hostel ji "international standard facility" nung ajungkettsü lemtet aser iba ajanga revised DPR nung Rs 6 crore yanglua liasü ta ANCSU-isa ashi.

REC agütsüba sen dang nungi Rs 2.47 crore talila nüngdakba agi IDAN-i sorkar dang state share ama sen agütsütsü asüngdang saka state sorkari sen magütsütetsü ta langzü. Iba ajanga mapatong metenzükter arur saka CSR guidelines kübok REC-ibo extensions agütsüogo.

REC-i mezüngbuba installment agütsür küm asem süia arur saka senji current account ka nung mamshii dang lir aser iba jagi REC-i mapatong inyaktsü mapang tembangba ajanga sen meyipa agütsü mapa tenzükogo ta ANCSU-isa metetdaksü.

IDAN-i "international standard hostel" yanglutsü ta asüba nung

ashishiteper kechiyong tang tashi ANCSU den blueprint mesüra detailed facilities plan kecha melemsateper.

Mezüng CSR sanction asübaji girls' hostel ka yanglutsü atema liasü aser onoki aiben shidi zülüaka, nenshiaka aser mepishiaka state sorkar aser bangdak department-i mapa metenzükter ta ANCSU-isa ashi.

Kohima Science College nung tetsür kaketshir teimba lir aser tang parnok asoshi 100-bedded hostel dang lir.

ANCSU-i tawa tu Chief Secretary dang tebang aitsü mepishi aser REC dang May 1 nü mapatong mapang atsülangtsü atema mesüzüktsü shogo saka sorkari company mesüzüktsü jenjang ka nung mali ta tebang agi langzüogo.

Iba mapatong metenzükba ya department aser state sorkar tamakok ajanga lir anungji CSR sen lemezükja aliba kümzükä ayutsü aser Kohima Science College nung tetsür kaketshirtem yaritsü asoshi mapa tenzüktsü akhangar ta ANCSU-i tanü metetdaksüogo.



Dimapur Govt College Auditorium nung May 08 nü Dimapur Langpangkong Watsü Telungjemi Tetsütem Anogo nungtem nung ayongzükba lokti chiyong sentong nung nisungtem chiyongtepba noksa nung angur. Iba sentong nung aruba sen agi Langpangkongtsürtemi nübortem asoshi mapa tajung inyaksü tebilemba lir ta DLWT lenirtemi metetdaksü. Tanü iba sentong nung nisung meyirijang pezü dak tali arua chiyonga liasü.

### Tang tashi yimdak-yimtsüngtem nung radio ya tongtipang lir: Sekhose

**Kohima Monupii/May 08 (TYO):** Tanü tashi radio ya, talisa yimdak-yimtsüngtem nung osang anguba source tongtipang ka lir, ta Director, Youth Resources and Sports, Nagaland, Kethosituo Sekhose-i ashi.

Akashvani Kohima ajanga küm 90 tashi linük nung sentong balala broadcast asüba nungtem nung Hokulbarnü "Akashvani Marathon" sentong nung jembidang, radio yagi küm aika putu balala sendaktepja aru aser tanüa tesem balala nung aliba nüburtem sendaktepba nung tongtipang shilem agir, ta Sekhose-i ashi.

Temang anema alitsü tongtipang ta angatetdakja pai nüburtem dang Viksit Bharat 2047 mangdang nung shilem agia linük yangerba nung teyakyak shilem agitsü ayongzüka liasü.

Iba marathon ya Old MLA Hostel Junction, Kohima nungi Deputy Commissioner, Kohima, B. Henok Buchem-i tenzüksü aser High School Junction nung tembanga liasü.

DC Buchem-i iba sentong nung jembidang, ibai "ola, ken, osang aser otsü indang marathon" ka lir aser küm aika broadcasting ajanga nisung million aika tongogo, ta ashi.

Ibai broadcasting puti otsü nung alizüng ka kisüng masü saka ajaki lemsatapa otsü ashiba aser ken atenba ajanga telungjem tali adokdaksüba benjong ka lir, ta pai ashi.

Sentong nung Programme Executive Khriesaneisa Rutsa-i Akashvani Kohima ya January 2026 nung küm 63 jungogo aser tang Primary Channel aser FM Tragopan ajanga programmes 55 dak tema broadcasts asür ta ashi.

Kohima station ajanga iba nungtem nung June 2025 nungi tenzükba sentong balala ayongzüka arur, ta pai ashi.

Rutsa-ia "My Beloved Village" sentong ajanga

Akashvani Kohima-i Nagaland nung district ajunga nung meta talang len aliba yimtsüngtem nungi audiences tonga arur ta ashi.

Iba marathon nungya government schools trok nungi kaketshir 180 den Akashvani staff züngsemtem shilem agia liasü.

Boys category nung T.M. Government High School nungi Ketouselie-i mezüngbuba jenjang angu aser girls category

nung mezüngbuba jenjang ya Dr. Neilhouzhü Kire Government Higher Secondary School, Seikhazou nungi Vibeizonuo Nienu-i ngua liasü.

Iba sentong ya Department of Health and Family Welfare Nagaland kübok National Health Mission aser Miachieo Market, Peraciezie den lungjemer State Bank of India, Regional Business Office, Dimapur Region-i sponsor süa ayongzüka liasü.

### Chümoukedima DPDB senden May 11 nü amentsü

**Dimapur, Monupii/May 08 (TYO):** Ita shia amenba Chümoukedima District Planning & Development Board senden May 2026 atema Deputy Commissioner, Chümoukedima nung May 11, 2026 anügdang 11:00 ako nungi

amentsü, ta Deputy Commissioner, Chümoukedima, Polan John, NCS-i sangdong ka nung metetdaksüogo. Iba senden nung züngsem ajak medema arua adentsü ayongzük, ta sangdong ajangasa ashi.

### BJP Nagaland-i district level training ayongzük

**Dimapur, Monupii/May 08 (TYO):** Bharatiya Janata Party Nagaland ajanga Mon, Longleng aser Aboi (Org) districts tem asoshi Pandit Deendayal Upadhyaya Prashikshan Mahabhiyan-2026 kübok anogo ana district-level training sentong ka Longchang Village, Aboi nung ayongzüka liasü.

sentong nung jembidang ENPO region nung terenlok atema teimla aliba, talisa tourism aser agriculture sectors nung nükla tajung aliba indang lemsatapa liasü.

Iba workshop ya organizational structure tashi itshiba, tangatetba jangjatepba aser grassroots outreach nung rangloker ayongzüka liasü.

Pai nüburtem dang elections mapang sen meshiba yimya mamshitsü aser shidakba terenlok asoshi bendanga agütsür inyakba lenirtem shimtsü ayongzüka liasü.

Iba sentong nung session balala lemsar BJP ideology, organisational expansion, booth management, social media outreach aser Modi sorkar indang scheme balala inyakba indang tali jangjatepba liasü.

Ato Kilonser Narendra Modi kübok nübur ajangzüksü schemes balala tenzükba ajanga makamaiter tem yarir, saka awareness peria maliba ajanga temsüa alir aika iba teyari mangur, ta pai ashi.

BJP State president Benjamin Yephthomi-i iba

Pai party karyakartas tem dang sorkar indang scheme indang awareness prokshitsü aser nüburtem item teyari agiba nung yaritsü ayongzüka liasü.

### Nagaland tesem balala nung World Red Cross Day mungogo



KOHIMA

**Kohima, Monupii/May 08 (TYO):** Alima rangben den külemi Nagaland nunga tesem balala nung May 8, 2026 nü World Red Cross Day munga liasü.

#### KOHIMA:

Kohima nung Indian Red Cross Society Nagaland State Branch (IRCSN) ajanga World Red Cross Day nungtem nung "Walk for Humanity" ayongzüka temeim, telungjem aser nisung meimchir tenzükba tanüla tali akasoa liasü.

Iba sentong nung tanurtem, lanurtem aser teintet rogotem Red Cross Complex nungi Old NST tashi jajaa taküm alima nung iba omen "United in Humanity" jangjashija tesem balala nungi nüburtemi shilem agia liasü.

Iba sentong nung MLA Dr. Tseilhoutuo Rhutso-i jembidang,

nüburtem aser talisa lanurtem dang anogoshi libaliru nung nisung meimchir ajunga dang temeim sayuba tanüla nung alitsü ayongzüka liasü.

Pai Red Cross tenzüksang Henry Dunant-i Italy nung Battle of Solferino nung yirur aliba sepai 40,000 dak tema yaritsü asoshi nüburtem anidenba indang otsü shia liasü.

"Kodang nisung meimchir ta südir, tamangba yimsü ya mezüng mesüdaksür. Yangji arishi küm telatet mali, kin telemsa mali. Humanity ya temulungjang nungi tenzük, ta pai ashi.

Humanitarian service ya mapa tulu inyakba kisüng masü saka anogoshi takum nung tatishitsü agi pei mapa nung ochishia inyakba, classmates aser kidanger nungdaka alirtem yariba dena lir ta ashi.

Nisung meimchir-i adokdaksüba rara aser tebilemtsü tem ya temeim sayuba ajanga dang akoktsü, ta pai ashi aser "Walk for Humanity" ya asen kibong, asen alidak aser lokti nung yimya ka kumdaksütsüla, ta Dr. Rhutso-i ayongzük.

Taküm iba anogomung omen "United for Humanity" ajanga nisung meimchir asoshi mapa tajung inyaksü ajungmesor, ta ashi.

Iba sentong nung Indian Red Cross Society indang Secretary General-i züluba shiti ka IRCSN General Secretary Akhale Khamo-i zünga liasü.

Queen Mary Higher Secondary School aser Mayangnokcha Government Higher Secondary School nungi Junior Red Cross züngsem temi ajangshibatem lemsatapa liasü.

Iba sentong nung Khyo TCK menden liasü aser Vice Chairman IRCSN Dr. R. Rose Chakhesang-i melepzüng o jembia sentong tembang.

Iba sentong nung IRCS Life Member Alemyanger menden liasü, Dr. S.S Akaba Longchar, IRCS Honorary Secretary ajanga pela agizükba o jembia aser CMO Mokochung, Dr. Tiasunep-i melepzüng o jembia liasü.

**MOKOKCHUNG:** Indian Red Cross Society (IRCS) Mokochung District Branch ajanga World Red Cross Day ya "United for Humanity" omen nung ajemdaker Office of the Chief Medical Officers, Mokochung indang Conference Hall nung ayongzüka liasü.

**CHÜMOUKEDIMA:** Indian Red Cross Society Chümoukedima district branch-i World Red Cross Day nungtem nung Blood Centre Team, District Hospital Dimapur den lungjemer St. Joseph University, Ikshe Village, Chümoukedima nung voluntary blood donation camp ka ayongzüka liasü.

Chairman IRCS MKG District Branch & Deputy Commissioner, Mokochung, Ajit Kumar Verma, IAS-i iba anogomung ratet tongmelang agi lemsatpdang, International Committee of the Red Cross tenzüksang Jean Henri Dunant asoba anogo nung World Red Cross Day ya amunger, shibai Nobel Peace Prize mezüngbuba ngua liasü ta ashi.

Iba sentong nung DHD nungi Dr. Rongsen Longkumer-i anir ketdangsurtem aden aser IRCS Chümoukedima district branch nungi Vichütuolie Mere, Chairman; Mhiesitsolie Khate, Honorary Secretary; Bendangchuba Pongen, MC Member; Khrietuo Yhoshu, MC Member aser K. Naben MC Member nungertem dena liasü.

### Vijay-i aniba TVK-i sorkar akümtsü atema menden perianguogo



Chennai, May 08, 2026: Tamil Nadu nung sorkar akümtsü atema Tamilaga Vettri Kazhagam (TVK) party tongti Vijay mejaokba atema Congress-i Angh, Rajendra Vishwanath Arlekar anema longkak aitba noksa nung angur.

**New Delhi, Monupii/May 08 (Agencies):** Tamil Nadu nung sorkar akümtsüa TVK-i menden peria ngutetogo, ta Hokolbarnü osang ka ajanga metetdaksü.

Tawa Tamil Nadu assembly election nung TVK-i menden 108 nung takok ngua liasü, aser Congress MLA ponguia parnok pusemsü telemtetba agi, ajisüaka sorkar akümtsüa simple majority (menden 118) matoksai liasü.

Hokolbarnü Viduthalai Chiruthaigal Katchi (VCK), Communist Party of India (CPI) aser Communist Party of India (Marxist) party temia Tamilaga Vettri Kazhagam (TVK) party yaritsü metetdakja liasü.

TVK-i menden 108 tashi nung takok angu, ajisüaka Vijay-i takok anguba menden ana nungi menden kabo toktsütsüa akümtsü, anungji parnok menden 107 dang asütsü.

Tang Congress party, VCK, CPI aser CPM-i TVK pusemer, anungji sorkar akümtsüa majority züngya 118 abensaogo. TVK MLA 107, Congress 5, VCK 2, CPI 2 aser CPM MLA 2 lir.

Tawa election nung Congress-i DMK den lokteper toktep, ajisüaka Congress-i tama TVK yaritsü atema telemtetba agia liasü. Party anaji senteper menden 112 dang, anungji sorkar akümtsüa

menden mabensai lia ano party aseme TVK pusemba ajanga sorkar akümtsüa menden abensaa nguogo.

Delhi nung osangbenertem den jembidang CPM general secretary MA Baby-i, CPI, CPM aser VCK senteper MLA trok lir, ibayongji TVK nem sorkar kümdaktsütsü atema TVK pusemsü telemtetba agi, ta metetdaksü.

CPM lenir P Shanmugam-ia, Vijay-i shidi ka ajanga onok dang teyari meshia liasü, ta metetdaksü.

Paisa, 'hung' assembly mapang nung sorkar akümtsü atema single largest party jaoktsü asoshi telatetba lir, ta metetdaksü.

### Tawa tebur dang nungibo tetsür voters shilem teimbai vote agütsü

**New Delhi, May 08 (Agencies):** Tawa state pezü aser Union Territory ka nung agiba assembly elections nung tebur voters dang nungibo tetsür voters shilem teimbai vote agütsü, ta Election Commission-i metetdaksü.

State tem rongnung voters teimbai vote agütsüba West Bengal liasü (shilem 93.71). Iba state nung vote crore 6.38 agütsü. Vote agütsütsü temsüa alir tetsür shilem 93.8-i vote agütsü aser tebur shilem 92.06-i vote agütsü liasü.

Tamil Nadu nunga tetsür

shilem 86.2-i vote agütsü aser tebur shilem 83.77-i vote agütsü.

Assam nunga tetsür shilem 86.53-i vote agütsü aser tebur shilem 84.95-i vote agütsü.

Kerala nunga tetsür shilem 81.17-i vote agütsü aser tebur shilem 74.9-i vote agütsü.

Puducherry Union Territory nung tetsür voters shilem 91.39-i vote agütsü.

Ajisüaka takok angur candidates rongnung tetsürtembo shilem ishika dang liasü.

Tamil Nadu nung tetsür 23

(shilem 9.83)-i takok angu, West Bengal nung tetsür 37 (shilem 12.62)-i takok angu, Kerala nung tetsür 11 (shilem 7.85)-i takok angu.

State tem nung NOTA (None of The Above) votes bo ishika dang liasü.

Tamil Nadu nung NOTA votes shilem 0.4 dang liasü, Assam nung NOTA votes shilem 1.23 liasü, West Bengal nung NOTA votes shilem 0.78 liasü, Kerala nung NOTA votes shilem 0.57 aser Puducherry nung NOTA votes shilem 0.77 liasü.



May 08, 2026 nü Puducherry nung Chief Minister N Rangaswamy-i Union Minister, Mansukh Mandviya (tiyong) agizükdang tangokba noksa nung angur.

### Air India tayimtsü tsükokba report ita ka tsüngda sangdongtsü: Minister

**New Delhi, May 08 (Agencies):** Yaküm June ita nung Ahmedabad yimti nung Air India indang tayimtsü ka tsükokba bushisüngdangba maparen tatembanglen kati arudar, aser iba report ya ita ka tsüngda sangdongtsüa akok, ta Hokolbarnü Union civil aviation minister, Rammohan Naidu-i metetdaksü.

Paisa, iba bushisüngdang ya kanga nendaka aser teladak süa inyaker, kechiyong iba lendong atalokba ya tanga linüktemia tenük yoka reprangdar, ta metetdaksü.

Gujarat kübok GIFT City nung sentong ka nung adenba sülen osangbenertem den jembidang Naidu-i, Aircraft Accident Investigation Bureau (AAIB)-i iba tatalokba bushisüngdangdar aser sorkaria akokba tashi yaridar, ta metetdaksü.

"Iba bushisüngdang kanga junga agidar. Asenoki ya angatetsü tim- kodang bendanger passenger tema lia tayimtsü ka tsükokdir iba bushisüngdangbaji tanga linüktemia tenük yoka repranger. Linük mesüra organisation mashie kati

tasüngdangba akatsü akok," ta minister-isa metetdaksü.

"Ibayongji iba bushisüngdang ya kanga nendaka aser teladak süa agir," ta pai ashi.


Paisa, "Aircraft Accident Investigation Bureau (AAIB)-i iba tatalokba bushisüngdang aser parnoki nüngdakba ajak onoki agütsüdar," ta ashi.

Tayimtsü tsükokba lendong nung asür kinüngertemi iba bushisüngdang ya teladak asütsü akhanger. Tawa Gujarat nung kibong 30-i shidi ka ajanga Ato kilonser Narendra Modi dang, iba lendong atalokba kuli metettsü atema Cockpit Voice Recorder (CVR) aser Flight Data Recorder (FDR) black box data ji sangdongang, ta mepishia liasü.

Yaküm Ahmedabad nung aliba airport nungi London kübok Gatwick-i apusoba Boeing 787-8 tayimtsüji minute ishika tsüngda tsükokba liasü.

Iba lendong nung tayimtsü nung alir nisung 242 nungi 241 asü aser ali nung alirtema nisung 19 asü. Iba lendong nungi passenger ka dang kümzüka liasü.

### Bengal nung BJP nungi mezüngbuba Chief Minister ji Suvendu asütsü



May 08, 2026 nü Kolkata nung BJP legislature party senden tembangba sülen osangbenertem senden nung Union Home Minister, Amit Shah aser BJP lenir Suvendu Adhikari na tangokba noksa nung angur. Hokolbarnü Adhikari BJP legislature party lenir shimogo. Bengal nung BJP nungi mezüngbuba chief minister ji pa asütsü.

**New Delhi, May 08 (Agencies):** Hokolbarnü West Bengal nung BJP nungi tang MLA tasenpurtem senden nung Suvendu Adhikari BJP legislature party lenir shimogo.

Suvendu ya Bengal state assembly nung opposition lenir liasü.

West Bengal nung BJP nungi mezüngbuba Chief Minister ji pa akümtsü.

BJP lenir tain aser taoba mapang state BJP Tir inyaksang, Dilip Ghosh-i legislature party senden nung Adhikari tenüng benoka liasü.

Iba senden atema Union Home Minister Amit Shah central observer shima liasü aser Odisha Chief Minister Mohan Charan Majhi co-observer shima liasü.

Senden nungi Shah-i, "Ni Suvendu Adhikari West Bengal BJP Legislative Party lenir shimba sangdonger," ta metetdaksü.

Tawa assembly election nung BJP-i takok ngua Trinamool Congress sorkar atsüngdokogo. TMC-i tesüiba küm 15 tashi Bengal yimsü süa aruogo.

(Maneni tapak 8 nung...)



## TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 09, 2026

### Jana agi tagitsü kümtettsüla

**A**lima nung kin ka shisa tenük lapoka nüchi akümdang, tamasa item nübortem jagi pei temang aser süoshi, pei alidak kiojen aser kima yimdong merütsü tenzüker aser iba sülen peisasa pei temang topur junga alitsü meranger aser pei aliba tesemtema topur junga ayutsü tenzüker. Aji oda, asenoka azüng zülua mashi, süoshi agitsü memetet aser merükmejua mali tesempatsüka lia liasüba tia nungi tangbo asenoki asen temang aser asen ki telong aser temabo merüka ayutsü angazükogo. Ajisüka, asenoki küm 50 jakdang asen lima nung asen alidak yimtsüngtem merükmejuba indang bilemdangra, yimdong sünga aksü aser nashi sü agi tetsüng tajemokdak maka tesempatsüka liasü aser nisungtem metsümeshidak tebur asoshi yimkong amendak yim tezülen sabang amai ka dang tema liasü aser tetsürtema pei sünglang aser aremlen dang metsümeshia liasü. Iba dakji alaka akhidangbo tanü amai mapaa aika mali asü aser chiyongtsüa tongmelang aser alijak menentsüsa tanü ama shishilembadak nungi jana kümer endoktsüba plastic aser polythene agi yangluba osettem mali asü, anungji akhi mapang nisung alidak yimtsüngtem nung nisung aser shiruru jana agi menenaka, tanü amai arem aser ayong dena menentsüsabo jana mali asü. Aji oda, akhi mapang asenok temang, kiojen aser kima yimdong memerüki aliba tia nungi tangbo asenoka asen alidakbo kanga merüka kümogo. Ajisüaka, tanü asenoki asenoksasa bendenba tebilemstürtem agi asenoka dena tangoa mesaputsüsa inyakba mapa kaji, asenoki asen nungdaktem shishilembadak nungi alia bener arudang, itemji plastic aser polythene agi aleper bener arur aser asen nungdakji agiteta yurbo asenoki item taleptsü plastic aser polythene-temi asen kima kilentzü nung endoker aser ano karibo pei kidang oktenba jana ajak seper tangar kima oa toktsür. Aji oda, tanü lima yabo akhi putu ama masü, mapaa aika aser chiyongtsüa aika, anungji taginübaa aika, anungji nisung shia pei nungdak atema amshir anungba aser endokba janaonaji kibong shia nung anogo shia seret aika bendenteter. Atangji, town-tem nungbo yimten (council)-i anepalua janaona aokba aser endokba gari nung bendener endoker saka yimtak yimtsüngtem nungbo, tang tashi yimkong asoshi külemi janaona bendener endokba inyakyim mali, anungji pei pei endoknülen endokba agi jana jagi arem aser ayong asünger aser iba jagi tzü mopong menendaktsür aser arem aser ayong nung aliba taküm samatsür. Atangji, town-tem nung janaona bendenba endokba inyakyim liaka, itemji nisungtem asoshi timtem aser takoksa küma maotsüsa jungjunga inyaker masü saka Town aser Municipal Council purtem jana bendenba endokba yimya aser tesemjisa tamajungba aser tesempatsü taketba angutsü. Tangarbo anepdang shia yimti yimdong tzü agi dena shidoker saka asenokbo kiojtsü agia junga mokteter aser jana bendenba oagi endokdakji jana agi tenem küma nangdener aser jana aokertemjibo toktsür yimti nung alirtem asoshi tashidak poktetdak tesemang ka kümadoker. Atangji, tanü putu yabo jana agi tagitsü rongsen küma yanglutetba putu nung asenok alir, anungji asenokia tangar amaji aseni bendenba jana yagi tagitsü rongsen küma yanglutettsüla. Ibaji tanü asen lanurtemi melamelaa inyaktettsü. Item sentongtemji Town aser Municipal Council den shisalemsatepa lanurtemi inyaktsü merangtsüla. Alima nung ya kar timtemji kar atema temoatsü akümer. Aji oda kar shirangbaji, mozü ayoker aser mozü ki lapoka alirtem asoshibo tajangzük akümer ta asüba ama, tanü asen lima nung jana junga meindoktet timtemba tia ya tajangzük küma yanglutettsüsa lanurtem dak tokolok shisatsü aser temetetba alitsüla. Asenoki angatettsüba kaji, alima nung kaketshisatsü bushiba ya pei kisüng agitsü asoshi degree bushiba mapa ka masü saka nisungtemi ajuruba tebilemstü koktsütsü asoshi shisatsü bushiba mapa ka lir. Aji oda, mapang aser senotsü endoka doctorate tashi azüngbaji masü saka asen azüngba nungi angazükba shisatsü aser temetetba ajanga nisungtem nungdak bushiteta agütsüteter asü magütsüteter ta asübaji dang tongtibang tagitsüji lir. Atangji, school azüngba ya degree atema masü saka jana agi tagitsü küma yanglutettsüba tashi aser temetetba bushir ta asenoki angateta inyakdi.

## OLEMSABANG

### Tia Melenshitsür

R. Talimoa

*(Iba Yimdangjem otsü ya Tir Yimyim aser Bookipedia nati ayongba toktepe nung shilem agirtem rongnung ka liasü)*

*(Yashi adok nungi...)*

Ashiba ama, pai aginüa aliba pa aliba jila nung mozü ki tajung ka nung Doctor mapa inyaktsü maongka angu. Tetsü tena nungdak ajak peria bendenba pelatepa ali. Kenü nikongtsütsü Doctor Tiajungbai tetsü dangi arua tatalokba ka lemsatep. "Oja, tanü temiemtsü tambur ka kinunger teyariteper shinga mali aser patemangji kanga mejungi Operation magi nungbo kecha lenmang maliasü, anungji koda masü tia ka ajurua ni kü rongsen agi Operation takok ngua agir yokogo". Tetsüi langza ashi "Jabaso nai mapa tajung inyakogo rongsen ya tanü lir asüng malitsü saka mapa tajung inyaktetba yabo kodanga mesamatsü.

KenüTsüngremi mapa tajung inyakogo ta ashitsü maongka alangzükttetba asoshi na pela liang". Mapang tatsü kasüiaor külen, künep tambosang Doctorba ki bushia aru aser kishi nung akoshi. Doctorba kishi lapoka alu nung pai yariba tambosang to pa ket nung akaba tebu senmang azük ka bener arua Doctorba nem agutsü, "Doctorba nai ni kümzük nung ni kebu senmang ya nü nem agütsür" ta shiaagütsü. Doctor Tiabai tambosang teka ameter "Oja,Oja, "tajak ilungi anirai aser tetsüdang "Oja ni yariba tambosangtoya" ta ashi. Idangji tetsü aoksar pai amaaaliba oset ali nung tsükdaktsü. Idangji ano tambosang jia ali nung menadok. Aji ngua Doctorba kanga aoksaa "Ya kechi asü" ta ayimten. Idangji tetsüi "Tiaba nai yarisang Tambur ya nebu lir" talangzü. Tesüngmangtsü ola angashia Doctorba kanga aoksa ajeb. Idangji Tambosangi "Ni tashi mait taküm kü dang tai tokang, tai tokang," ta ayimtena ajeb. Aji angashia Doctor Tiabai "Tai tokogo anenang ni kebu anguba atema kanga pelar. Arung, Tsüngrem tenüng sangdi Tsüngremer tesüngmangtsü sentong asenok nem bener arutsügo".

Kechiyong tetsüi tebu tena atalokba tanur dang ajakbo mashi saka tebu tena toktsür aoba dang shir liasü. "Oja, tanübo ni mapai maotsü asenok tajungtiba chiyungtsü renemang". Tetsüi Takaba tebu dang asüngdang, "Koda ner tsürabur aser kinunger ajak junga lir südi?" Takabai langzü "Ajak tembangogo, kenui sentsüh bener aruba agi ozü rongsen ajak amajok nung tematokogo. Onok talidak maka yimti tezülen aremnunglia tsüraburi anir kenu nunger ajak süadoker ni kisüng anung. Anonia tasütsüba agi meneper lia Doctorbai kü takum kümzükogo". Idangji Doctor Tiajungbai "Arung, süia aoba mapatem aser anogotem yutsüdi ajakji Tsüngremer mopungsem agi bener oadokogo.

Ajiang, asenok asoshi tepelatsü taochi mopungsem tasen ka bener aruja kar. Iba asoshi asenoki Tsüngrem tenüng sangdi. Arung, "Oja, kebu nena teka amtepang, tanü asenok asoshi kibong tasen soshiba anogo ka bener arutsügo". Yamaji par kibong tanabensoshia tepelanung liaao. Tatemnung, "Shiri kaaita alidang pei sasa inyaktet ama aser pei sasa olu ama bilema alir, kenü parnok leptoktsü. Taküm lenmang kechi tia ajurudir ajuruaka, pei sasa aremzüka khuret bentettertemi moa. Anungji, kenü aseni inyaktetba yari Tsüngremi asen nem senpettsütsü"

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Longjang Baptist Arogo 2030 küm 125 ajungtsü aliba jeli Sangdong Salaba Sentep Sentong agi



Secretary Prof. Rev. Dr. Mar Pongener ajanga "Jubilee Yimyim" ta asüba onük nung ajemdaker Tsüngrem o lemsatepa liasü.

Sentong nung Tsüngremer lenisüba jazüka Longjang Compound Baptist Arogo Pastor Wb.P.Temsü Jamir-i sarasadema sentong tenzük aser Planning Committee Chairman Wb.Tali Imsong ajanga tayongzükba o jembi. Ano sentong nungsa Longjang Senso Mungdang President, Medemsanger Putu Menden Longjang Chairman, Longjang Senso Telongjem Mokokchung President, Longjang Senso Telongjem Kohima President, Longjang Senso Telongjem Dimapur President Longjang Senso Telongjem

Chumukedima President, Longjang Senso Telongjem Tuli President, Longjang Senso Telongjem Tzüdikong President aser Pastor Wb.Senti Longchar parnokia shilem agia jembiba den Khanimu Baptist Arogo Pastor Wb.B.Yashi Longkumer-i tenüngsang agüja sarasadema sentong tembangba den Wb.A.Wati Longkumer lenisüba nung sentong agi.

Longjang Baptist Arogo nung QQC nüngtem nung sentong balala küm shia agiyonga aotsü asoshi, taküm 2026 küm asoshi tanü agiba sentong ya asütsü 2027 kümji "Sarasadem aser Tsüngrem O", 2028 kümji "Asentensi". 2029 kümji "Nisung Rongnung Yimjung" aser 2030 kümji "Jubilee Küm " ta rename lir.

**Mokokchung, Monupii/May 08 (TYO) :** Longjang Baptist Arogo küm 125 ajungba Quasquicentennial 2030 küm Omen: "Khrista nung asenok Yangluogo" Efesa 2:10 nung ajemdaker amongtsü lir.

Iba Quasquicentennial dak ajemdaker Longjang Baptist Arogo nung May 08 anogo QQC 2030 jeli Sangdong Salaba Sentep Sentong ka ayonga kaogo. Sentong nung Nagaland Baptist Church Council General

## Odisha nung Khristantem amakba nokdangtsü atema kecha meinyaker



Taküm March 3 nü Odisha nung raksatsüba Pentecost Arogo Tenla ki ka Khristan temeden atema inyakertemi semdangba mapang tangokba noksa nung angur.

**May 08, 2026:** Odisha state nung mapang shia Khristantem anema inyaker aser asalentong yanglur Khristantem bendangshidanga züngshir, ta meimchir temeden atema inyakertem aser journalist temi tentetba team kati metetdaksü.

Tan ita tetenzüklen People's Tribunal nungi team kati Odisha kübok district 12 semdanga takoksa anguba Khristan 300 shi ajurua asüngdangyaa liasü.

Khristantem jagi parnok dak azükba, loktiliba nungi jendokba, yimtsüng nungi aridokba aser police-i amokmerenba osangtem metetdakja liasü.

May 6 nü team jagi Odisha chief secretary nem shidi ka agütsüogo. Parnoki chief secretary dang, talisa tribal nütsüng aika aliba state nung Khristantem anema inyakba ajanga takoksa angurtemi ashiba kulitemji taoksatsüka lir aser shisabulutsüsa lir, ta metetdaksü.

Odisha nung district 12 semdangba team nung züngsemtemji journalist John Dayal, yimtenren commentator Aakar Patel, meimchir temeden atema inyaker Vidya Dinker aser kaketzülur/meimchir

temeden atema inyaker Harsh Mander nunger liasü.

May 6 nü osangbener den jembidang Dayal-i, "Ochi bushiba team-i state tesem balala nung Tenla kitem amakba, pastor aser putirtem amakba, sarasadem sentong tagidak mapang nung timtem agütsüba, tangartem Khristan yimsü dangi meyipdaksür ta lenirtem nem tiyazü nung tai tongloktsüba aser police station nung pua ayuba mesüra jail nung puokba osangtem bendenogo," ta metetdaksü.

Paisa, item tatalokba aika nung police-i Hindu nationalist teloktem tetuyuba nung inyaker aser Khristantem dang Khristan yimsü tokjang ta rongshir, ta ashi.

"Ano tatalokba aika nung police-i Hindutva organizations den longjemer tekülem sentong magitsü atema Khristantem nem nangzükdakja sign südaksür," ta pai ashi.

Team-isa, ano külen Khristantem anema inyakbatem nokdangtsü atema state ketdangsertemi kecha meinyaker; police, civil administrators, MLA tem aser minister temia takoksa

angurtem mekümzükterer mesüra ozüng mebenokteter, ta ashi.

Khristantem, talisa Dalit nungertem aser tribal Khristantem nem yimsü temeden magütsür, ta team-i metetdaksü.

Parnokisa district aika nung Khristantem loktiliba nungi jendoktsü aser sorkar teyari magütsütsü atema asalentong yanglur inyaker, ta metetdaksü.

Dayal-i, yimtsüngtem nung Khristantem jendoker, mapa magütsür aser yimtsüng kar nungbo Khristantem kidang nungi meindoker, ta metetdaksü.

2008 küm nunga Odisha kübok Kandhamal district nung Hindu yimsü alia amangertemi Khristantem anema apusoba mapang Khristan noklang aika tepset, nisung 75,000 dak tali jenshi aser Tenla ki aika raksaja liasü.

1999 küm nunga Odisha kübok Keonjhar district nung Hindu yimsü alia amangertemi Australia nunger missionary Graham Staines aser par jabaso ana gari nung amoi oa lia gari nungji mi senokja rongseta südaksü.

## ANO GO ABEN TSÜNGREM DEN

### Sinai aser Kalvary

Asenok Sinai tenem tsüng nung dang alitsü menungdak. Ibai anentsübang nung nokdakba mesüka lir.

Asenok ozüng agi mekümzük, mesüra kümzüktsü makok. Ozüngi asen tamakok zübu anebtsütsü makok. Tamatokba nisung asoshi Ozüngji kecha menungdak, saka "tanak aser amang aser yipru." Ibai ola maka saka tetsübuttsü sangdong ozüng lir, osang mali saka amokmerener, merepranger saka tejak ashiloktsür. Shibai Sinai tenem tsüng nung ki asütsü?

Saka nenok Zion tenemi aruogo. Asenok shidakba ki Sinai tenemtsüng nung mali, saka Kalvary nung lir. Mezüngbuba tenem nung temenen pur asoshi ki maka; tanabuba tenem nung ajak atema ki kar. Kalvary nung asenoki samar aliba temeshiba dangi aoba lenmang angutsü akok.

Taochi ajanga asenoki asen menen khuret endoker tekümtet sobutsü semoktsü akok. Kotak lenmangi meyipba lenmangji yimti jara mali "rem alidak tenem" lir. Kanga aniseta ainlen jartemi atongtsüba tenemji ibai aser shibai ajak endok pai taküm ajunga kümtdedakba sungkümbong meyipa angutsü. "Na tasen tezüngzüktepba agütsüsang Yisu dangi arua lir."

## Daystar Ministry Tir, Joni Lamb alima nungi pilaogo



Joni Lamb

**May 08, 2026:** The Daystar TV ministry-i sangdong ka ajanga, Daystar tentetla aser Tir, Joni Lamb Kibuba den alitsü atema ogo, ta metetdaksü. La arrshi küm 65 liasü.

Daystar TV ministry-i, Joni Lamb temang kanga mejungi liasü, iba denji külemi tawa la teberem yiruba ajanga ano temang tamajungba dang aküm, ta metetdaksü.

"Medical team-i tajungtiba nung la yariaka aser alima tesem balala nungi la atema sarasademjaka tesüiba anogo ishika tsüngda la temang ano tamajungba dang aküm," ta ministry-i sangdong ka ajanga metetdaksü.

Joni Lamb aser la mezüng kinüngbu Marcus na küm 39 tashi liasü. La kinüngbu Marcus tenati küm 30 dak tali iba ministry ajanga alima tesem balala nung Tsüngremi agütsüba tekümtet osang sangdonga aruogo. Marcus

2021 küm asü. 2023 küm la tanaben Dr. Doug Weiss den kibong aküm aser Weiss-a iba ministry nung tenzüker.

Daystar Ministry-i, Joni Lamb Kibuba dangi oaka iba ministry maneni alitsü, kechiyong lai jelia sentong renemtsür liasü, ta metetdaksü.

Joni Lamb-i Board dang, "Asenoki kin ajak den Yisu Khrista osangtajung lemsatepba ya maneni broadcast asütsü," ta metetdakja liasü.

Joni Lamb'er medemer aser pastor, Paula White-Cain-i X ajanga, "Kibubar yimli atema arkotong ka, lenir ka, sayutsüngir ka aser kü medemer Kibuba den alitsü atema ogo. Ni na menungratsü @jonilamb .. aser na Tsüngrem den lir ta ni meteta lir. Nai alizüng tonga asemogo," ta metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Yangyur**

(n) Külemi kar mapa nung kenü, kar mapa nung kenü ta inyakertem  
( persons working turn by turn wise in each other's work)  
\* Onok yangyur zünga tajung ka liasü.

**Yanü**

(n) asüing ser aruba anogo ( day after tomorrow)  
\* Asenok lokti senden ka yanü anepdang alitsü.

**OLONG PAITEP # 7498**

1		2					3			4
							5			
6					7					
				8	9					
										10
		11		12						13
14										
				15					16	
17										
				18						

**TIPIEN**

- 1. Ajaki metetba nisung - (8)
- 5. Temechi - (4)
- 6. Saku - (4)
- 7. Küm noklang züng - (3)
- 8. Pi - (6)
- 11. Anüing nung sentsüprang - (6)
- 15. Sü \_\_\_ ong - (3)
- 16. Sü apuba lisu - (4)
- 17. Tem \_\_\_ ba - (4)
- 18. Milen-i agütsüba - (8)

**LANGTSÜNGLEN**

- 1. Aginü / Tenük jalu - (6)
- 2. Hindu nungeri külemba shiruru - (5)
- 3. Ojang telong - (5)
- 4. Kilong masü - (4)
- 9. Chi den achiba - (3)
- 10. Songjen - (6)
- 12. Prangpong agi tu-et - (5)
- 13. Ozü yimzüdak - (5)
- 14. Tel \_\_\_ t - (4)

**OLONG PAITEP # 7497 TELANGZÜBA**

**TIPIEN :**

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu, 15. Raksa,
- 16. Arameso,

**LANGTSÜNGLEN :**

- 1. Alimang, 2. Pongen, 3. Samaru,
- 4. Nün, 6. Pio, 9. Nüingdak,
- 10. Yongya, 11. Kongro, 13. Ora,
- 14. Ata.

**NAI-A YA METETTER MA**



Pakistan tsür Fatima Naseem-i high heels semer minute ka nung balloons 35 poksaba atema Guinness World Records ka yangluogo. Arishi küm 12 tain Fatima ya black belt lir aser "most balloons burst by high-heel kicks above the head in 1 minute" atema otsü tasen yanglu.

**Manipur nung Governor's Unit Citation 2026 agütsü**



**Imphal, May 8, 2026 (Agencies):** Manipur Governor Ajay Kumar Bhalla-i May 6, 2026 nü armed forces, paramilitary forces, Border Roads Task Force, aser district police nem Governor's Unit Citation 2026 agütsüogo.

Imphal nung Manipur State Film Development Society nung iba sentong agi aser Chief Minister Yumnam Khemchand Singh-i anir Deputy Chief Minister Losii Dikho, state minister tem, MLA tem aser

19 Garhwal Rifles, 17, 38 & 40 Assam Rifles, 2 Mahar

Regiment, 25 Border Roads Task Force, Kakching District Police, Senapati District Police, Churachandpur District Police, 10 Border Security Force, aser 143 Central Reserve Police Force nem Governor's Unit Citation 2026 agütsü.

Iba sentong ya teti agiba sentong ka dang masü saka security forces-i Manipur nung tayongzükba jenti liaka yimjung aser tensa süngjemdaksütsü asoshi mapa tajung inyakba ajitetba mapang ka lir ta Governor Bhalla-i ashi.

Governor-isa security personnel kibongtemi bendanga

agütsüba atema pelaba metetdaksü aser security agencies o civil administration tsüingda maneni amalitepa aotsü ayongzük.

"Central aser State force-i law and order tiptema ayuba aser lendong ajurudang humanitarian assistance agütsüba atema tenünsang agütsür" ta Chief Minister Khemchand Singh-i ashi.

Paisa kin balala tsüingda putepa alitsü asoshi public amalitepa alitsü aser Manipur nung teti atema yimjung bener arutsü asoshi inyakba nung yariteptsü ayongzük.

**Arunachal Pradesh sorkari DA aser DR 2% tutsür**

**Itanagar, May 8, 2026 (Agencies):** Arunachal Pradesh sorkari mapa inyakertem nem dearness allowance (DA) aser pensioners nem dearness relief (DR) 2% tutsüogo.

Iba ajanga basic pay aser pension 58% aliba nungi 60% kümtsür. Iba revised DA aser DR ya January 1, 2026 nungi mapa tenzüktsü ta Chief Minister's Office-i metetdaksü.

Iba DA ya Arunachal Pradesh sorkar kübok inyakba All India Service officers,

central government employees on deputation aser state government employees ajaki angutsü. Maneni revised DR ya pensioners aser family pensioners ajak asoshi lir.

Centre sorkari central government employees aser pensioners nem dearness allowance aser dearness relief tutsüba sülen Arunachal Pradesh sorkari iba mapa inyakogo.

Iba mapa ajanga state nung regular employees 69,248 aser pensioners 40,477 ajangzüktsü

ta sorkari metetdaksüogo.

Kümshia iba asoshi state sorkar senpong Rs 100.54 crore endoktsü. January nungi April 2026 tashi arrears ji cash agütsütsü aser iba nung Rs. 33.51 crore talila endoktsü.

May 2026 nungibo revised DA aser DR ya monthly salaries aser pensions den külemi agütsütsü.

"Sorkar mapa inyakertemi maneni state nung nübertem ajungtsü asoshi bendanga agüja inyaktsü imlar" ta Chief Minister Pema Khandu-i metetdaksüogo.

**Mizoram & Ladakh den Jal Jeevan agreements sign asü**

**Aizawl, May 8, 2026 (Agencies):** Centre-i Mizoram aser Ladakh sorkartem den Jal Jeevan Mission 2.0 kübok tenangzüktep balala nung sign sütepegogo.

Loktii anir inyakba ajanga rural drinking water systems tashitaitba kümdaksütsü nükjidong nung tenangzüktep agiogo.

Sorkartem den memoranda of understanding (MoUs) ajanga service-based rural water governance lateter aser iba nung gram panchayats ajanga tongti shilem agitsü imlar ta Ministry of Jal Shakti-i metetdaksü.

Union Jal Shakti Minister CR Patil aser Minister of State V Somanna na lia video conference ajanga MoU nung

sign sütepa liasü.

Mizoram tenüing nung Chief Minister Lalduhoma aser Ladakh atema Lieutenant Governor Vinai Kumar Saxena nati sign asü.

Iba mapa ya water infrastructure yangluba dang masü saka village level nung service tajung agütsütsü asoshi temulung agütsür ta Ministry-isa ashi.

Centre sorkari 2028 tashi nung rural households ajak nem functional tap water connections agütsütsü nükjidong atongtsü asoshi agreements ya kanga tongtipang lir ta Union Jal Shakti Minister CR Patil-i ashi.

Sorkar anaprongi "Har Ghar Jal" certification angutsüsa mapa meranga inyaktsü

ayongzükter ta paisa shisem

Iba scheme kübok strongest-performing states rongnung Mizoram ka lir aser Centre-ia sanctioned projects ajak renemba ajitetogogo ta CM Lalduhoma-i ashi.

Mizoram nung rural households 1.33 lakh temai functional household tap connections nguogo. Mizoram nung tap water network kübok rural schools aser anganwadi centres tongogogo ta Lalduhoma-isa ashi.

Mizoram nung water quality testing infrastructure tajung amenoka lir aser iba dak alia laboratories 28 lir, karbo National Accreditation Board for Testing and Calibration Laboratories (NABL) süogogo ta paisa shisem.

# South Africa Tir Ramaphosa mapa yutsütsü akhanger

**Johannesburg, Monupii/ May 08 (Agencies):** South African opposition leader Julius Malema-i Tir Cyril Ramaphosa dang mapa yutsütsü akhanger, koba 2022 küm pa mapa nungi anentsütsü mera agiba nokdangba ya parliament-i constitution nung aibelenba lir ta Constitutional Court-i obendang agütsüba sülen ola adoker.

Malema'er Economic Freedom Fighters (EFF) aser tangar temi ken o benokba sülen iba obendang ya agütsü, aser ano pa anema ken o tasen benoktsü akok. Ramaphosa indang office ajanga pai iba obendang akumtsübor ta ashi.

2022 küm yimtsung nung par kidang sofa nung miima aliba sen \$580,000 (£430,000) auer-i ki kakkoka ia auyaba sülen Ramaphosa-i langzüksü ken o ka lir ta independent panel yagi shia liasü.

Iba sen auyaba ajanga iba sen kolen nungi aruar tejangja kuli mali ta pa aitsü. Tiri aibelen mapa meinyak ta shia liasü.

Ajisüaka küm pezü tejangdang parliamentary vote ka ajanga impeachment proceedings ya nokdanga liasü. Iba mapang Ramaphosa'er African National Congress (ANC) ya parliament nung majority liasü, saka 2024

general election sülenbo ANC yagi coalition ka nung dener yimsü süa arur.

Iba obendang agütsüba sülen Ramaphosa indang office-i ashiba agi, pa Constitution, Judiciary aser rule of law den züngzüktepa ama nokdaka lir.

Iba ken o dak sendakba nung asüngdangyaba ajanga nung tiri akok tashi yaritepa aru, ta sangdong ajanga ashi.

"Tir Ramaphosa-i nisung shinga ozüing dang temaba mali aser tai tonglokja alibatam tetsübo makai bushisingdangtsü tangatetba nung lir."

Johannesburg nung court kima osangbener den jembidang, Ramaphosa mapa nungi anentsüla aser pa anema ken o benoka aliba nung temulung agütsütsüla, kechiaser iba ya pa jurila asoshia kanga tebenja kumatokogo, ta Malema-i ashi.

"Nai ana metenzükteptsü - ka timtem ajurutsü lir," ta pai rasaa ashi.

EFF ajanga African Transformation Movement den külemi 2024 küm ken o ya linük nung tematiba court dangi aben.

Malema-i ashiba agi, Ramaphosa'er ANC züngsem temi pa mapa nungi anentsütsü, kechiaser parnok

jakdang kuli alitsü.

South Africa sorkar coalition nung second largest party, Democratic Alliance lenir Geordin Hill-Lewis-ia yimten yimsüsür temi rule of law shidak amshitsüla aser parliament indang impeachment committee-i tangbo mapa shidak inyaksüla, ta ashi.

Iba mangatettep ya 2020 küm tenzük, koba local media-i "Farmgate" ta ajar. Northern Limpopo province nung Ramaphosa'er farm, Phala Phala nungi sen \$580,000 auyaba sülen iba ken o ya temai adok.

Küm ana sülen independent panel ajanga tiri pa indang oath of office nung aibelenba alitsü akok ta kuli bushitet, saka parliament nung vote agitepdang impeachment committee tentetsü anemer vote 214 aser mulunger vote 148 liasü.

South Africa nung bendanger sen amshiba atema ozüing tesashi yanglua lir, aser anogo 30 tsüingta bank ama authorised dealer nem agütsütsü shia lir. Iba mapang Ramaphosa-i iba sen ya jang ka ayokba indang lir ta shia liasü.

Iba sen auyaba dak sendakba nung nisung asem anema ken o benoka lir.

# Strait of Hormuz nung khatepba sülena US-Iran ceasefire lir ta Trump-i ashir

**Washington, Monupii/May 08 (Agencies):** Strait of Hormuz nung Iran aser US naval destroyers tsüingta khatepba atema kati ka tenüing asenba mapang süaka US Tir Donald Trump-i Iran den ceasefire nung lir ta ashi.

Iran-i ozü warships dak missiles, drones aser rong tilatem yok aser ibai onoki rara mesüba ajanga masü, ta US-i ashi. Trump-ia tanü Iran-i onok mesüshi ta ashi.

Kasa mapang Iran mitkar tanishir temibo US-i Strait of Hormuz tonga aruba Iranian oil tanker ka aser ano tanga rong ka dak tenük yoker amak aser tzükumlen tesem balala nung anüinglen nungi amak ta tai tongloksü.

Iran foreign ministry-i rara tatem kati arutsü atema US proposal agüja aliba asadangtar ta shir anogo ka lir iba ya ataloker.

Ceasefire tashi maitba temaitsü ka ama Hokulbarneq United Arab Emirates' Ministry of Defence-i sangdong ka nung, Iran nungi missile aser drone amshia amakba nung par air defences kanga mazüing lir ta ashi.

Mezüngbo Iranian state media ajanga Strait of Hormuz nung ola tulu adoka apoka osang prokshia liasü aser item ya tsükchirtem den khatepba lir ta ashi. Ajisüaka ano local media ajanga Tehran nung apokba ola angashi ta ashi.

Mapang talangka melie Iran indang top military command nungi sangdong ka agütsüba nung, US-i anüinglen nungi Bandar Khamir, Sirik aser Qeshm Island nung amak ta ashi.

Onoki itangjisa telangzüba agüja US military vessels maka teraksa tulu agütsü ta ashi aser US-i ceasefire nung aibelener ta tai tongloksü.

Iran-i amakba ya onoki tenzükba masü aser US Navy guided-missile destroyers tem strait ajanga aoba mapang Iran sepaitemi missiles, drones aser rong tilatem yok, ta US Central Command (CENTCOM)-i ashi.

CENTCOM-i arua aliba timtem samatsü aser missile aser drone launch sites; command aser control locations; intelligence, surveillance aser reconnaissance nodes densema US sepaitem dak amakba Iranian military facilities amak ta ashi.

"CENTCOM-i tensa tamajungba kumdaktsütsü memeranger, saka American forces kumzüka ayutsü renema lir," ta sangdong nung ashi.

Trump-i pa indang Truth Social nung, US-i rong tila, missiles aser drones tem aika raksatsüogo aser Iran nunger tamaker nem teraksa tulu

agütsüogo, ta zülua liasü.

US tir-i ano yimjung tezüingzüktepa atema tekumdangtsü ka nenshia ashi. "Onoki tanüa parnok akozüka yokba ama, parnoki tezüingzüktepa nung kera meyongnem magütsüra, onoki tarutsü nung parnok kanga agi tesashiba nung akozüka yoktsü!" ta ashi.

Tang tesüsa amakba nung Israel maden ta Israel nunger osang kar ajanga ashir.

Iran nung rara ya yakta tembangtsü ta US tiri tawa jembia aruaka tensa tali tamajungba ang akumer.

US news outlet Axios-i ashiba agi, White House-i Iran den 14-point memorandum of understanding nung tembang nung ajungtsü ta amanger, koba ajanga nuclear nok-nü tali tejangjaba nung jembishinütsü atema framework ka yanglutettsü.

Bodhbarnü Iranian foreign ministry odongtar kati tang tesüsa US proposal agüja aliba shisadangogo aser Tehran-ia ozü tangatetba Pakistani mediators den lemsateptsü ta shia liasü.

Pakistan foreign minister-i ashiba agi, par linüki iba ceasefire ya teti asoshi iba rara tatem kati arudaktsütsü meranger.

Ajisüaka Iran indang parliament nung züngsem kati 14-point memorandum of understanding ya "wish list" ka dang lir ta ashi.

Iranian parliament indang national security and foreign policy commission atema odongtar Ebrahim Rezaei-i X nung, "Iran temeyong trigger nung yua lir" aser US-i bendanga magütsü aser nungdakba conditions magütsüra Iran-i sasatsüsa telangzüba tesashi agütsütsü, ta zülua liasü.

May 6 nü Truth Social post ka nung Trump-ia, Iran-i tezüingzüktepa yanglutsü memulungra bomb pokloksüba tenzüksü aser ibaji tejashitsüsa tesüiba mapang dang nungi kanga agi temaba aser tesashiba jenjang nung alitsü, ta zülua liasü.

US-Israel nati lungjemer Iran amak tenzükdang nungja agüja aliba Operation Epic Fury ya tatem kati arutsü ta Trump-i taoba mapang ashiba ajanga Iran-i züingzüktepa aliba ama inyaksü mulunger südi ta bilema liasü. Iba sangdong magütsüdang, US Secretary of State Marco Rubio-ia iba operation tembangogo aser nukjidong tongtetogo ta shia liasü.

Tang mezüing masü saka Trump-isa, Iran-i kodanga nuclear nok-nü meyanglutsü mulungogo ta ashi, ajisüaka Tehran nungi tejangja sangdongba mali.



**NATIONAL HIGHWAYS & INFRASTRUCTURE DEVELOPMENT CORPORATION LIMITED**  
(A Government of India Undertaking – Ministry of Road Transport & Highways)



1<sup>st</sup> & 2<sup>nd</sup> Floor, Tower-A, World Trade Centre, Nauroji Nagar, New Delhi - 110029

Website: [www.nhidcl.com](http://www.nhidcl.com) email: [recruit.tech1@nhidcl.com](mailto:recruit.tech1@nhidcl.com)

**RECRUITMENT NOTICE NO. 05/2026**

NHIDCL ajanga Technical Cadre nung E2 Grade (IDA pattern) nung tsüinglanglen agüja aliba Posts atema Direct Recruitment yimya nung temsüa aliba candidates nungi ONLINE applications meshir:

Sl. No.	Name of Post & Pay Scale	Number of Posts						Upper Age Limit	(I) Essential Qualification & (II) Eligibility Criteria
		UR	SC	ST	OBC	EWS	Total		
1	Deputy Manager (Technical), Pay Scale: ₹50,000 – ₹1,60,000 (IDA Pattern)	36	13	06	22	08	85	Not exceeding 34 Years (as on closing date of application)	(i) Degree in Civil Engineering from any recognized University/Institute; and (ii) Must have qualified GATE (Civil Engineering) in any of the year, 2024/2025/2026 and obtain a valid GATE score.

**A. TONGTIPANG ANOGOTEM**

- Online Application lapokba anogo : 09.05.2026 (1000 Hrs.)
- Online application shibangba anogo : 08.06.2026 (1700 Hrs.)
- Upper age limit jangjatsü atema Online application agizükba anogo ya shibangba anogo asütsü.
- Candidates temi updates/temelenshi/metongshiba/osangtsüsang amala atema NHIDCL website mapang shia reprangtsüla.

**Koma Apply asütsü:** Jangra aliba candidate temi online Application agütsütsü atema company website at [www.nhidcl.com](http://www.nhidcl.com) (Recruitment Portal) nung reprangtsü mepishir. Eligibility criteria, shimba yimya, placements, reservations, age relaxations, teinyaktsü mapa, totuyuba tem aser tapet osang jangjaner temi [www.nhidcl.com](http://www.nhidcl.com) nung angutsü mesüra Employment News nung May 9, 2026 nü tejangja agüja lir.



**GM (Recruitment)**

CBC 37112/11/0002/2627

**BUILDING INFRASTRUCTURE BUILDING THE NATION**

## May 30 nü 3rd Kohima District Futsal Championship alitsü

**Dimapur, Monupii/May 08 (TYO):** Kohima District Football Association (K DFA) ajanga May 30, 2026 nü Mez & Co Sports Arena nung 3rd Kohima District Futsal Championship 2026 ayongzüksü.

Iba championship ya knockout yimya nung asayatsü aser district nung futsal team tajungtem arua shilem agitsü imlar.

Iba asayamung Champions nem senpet sen 20,000 den Trophy aser kulizüing kaket agütsütsü, runners-Up nem

senpet sen 15,000 den Trophy aser kulizüing kaket agütsütsü. Semi-finals nung tsükba team ana nem sen 5,000 agütsütsü, ta K DFA sangdong ajanga ashi.

Iba asayamung nung Best Goalkeeper, Top Scorer, Player of the Tournament sempet agütsütsü.

Iba asayamung indang forms ya Flora Bakery, High School, aser Sports Paradise, Kezieke nung angur. Iba asayamung nung tenüing zülüoka aliba asayartem kisüing

asayadaksütsü. Asayartem tenüing zülüokba aser renewal phase tanabuba ya May 28, 2026 tashi alitsü.

Jangra aliba team tem aser futsal jangrar tem arua iba asayamung nung shilem agitsü ayongzüker, koba futsal temaba jenjangi ajungketa district nung saisapong yimya tashi itshitsü nükjidong nung ayongzüker.

Osang tali tejangjaba metetener temi +919402211604, +917005770397 ajanga jembitsü akok, ta K DFA ajangasa ashi.

## Cristiano Ronaldo-i otsü tassen yanglu



**Riyadh, Monupii/May 08 (Agencies):**

Cristiano Ronaldo-i ano alizüing tassen ka tongteta Al-Nassr-i Brehostibarnü Al-Shabab madak 4-2 agi akokba asaya nung pa asoshi Saudi Pro League (SPL) goal 100 buba agüja liasü.

Arishi küm 41 tain striker-i minute 75 buba nung iba alizüing tongteta Sadio Mane-i cross ka yokba nung iba goal agütsü. Iba goal ya Al-Nassr asoshi tongtipang takok ka kija masü saka Ronaldo football asaya tenzüker goal 971 buba aser tang asayaba SPL nung goal 26 buba alitsü.

"Ronaldo tejakleni aoba ya teti lendong lir aser ibaji tanüa nguogo," ta Al-Nassr coach Jorge Jesus-i ashi.

Iba asaya nung takok anguba ajanga Al-Nassr ya Saudi Pro League table nung point pongu agi tematiba jenjang nung mena lir aser asaya ishika ang anünga lir. Ajisüaka iba asayamung asoshi arishir Al-Hilal ya teimla lir aser taruba hopta Riyadh nung tena asayatsü.

"Joko onok ozü den kasa tokteper den asaya ka lir, koba kanga tasak alitsü. Ibai tongtipang ta onoki kanga junga meteta lir, aser onoki yangji rangloka lir, kechiaser tilateri

nungia result melenshitsü akok," ta Jesus-i ashi.

Cristiano Ronaldo-i tang tesüsa iba alizüing atongba ajanga pai goal agütsüba otsü tali tashi itshir. Tang pa ya football puti otsü nung domestic competitions balala asem nung league goals 100 agütsüteter asayar mezüingbuba kumogo.

Saudi Arabia nung iba alizüing matongdang, pai La Liga nung Real Madrid nungi aser Premier League nung Manchester United nungi goal noklang ka dak tema agüja lir.

Kasa mapang pa den mapang talangka nungi kasa toktepa asayar Lionel Messi den medemdingba tanaben temai adokogo. Messi-i Barcelona atema La Liga nung goal 474 agütsü aser tang Inter Miami asoshi MLS goals 58 agütsür lir, anungji pa league anabuba nung goal 100 agütsütetsü ano mapang lir.

December 2022 nung Ronaldo ya Saudi Arabia-i aruaka, ponguben Ballon d'Or sempet ngua alisang ya tang tashi Al-Nassr den tongtipang trophy kata monguteti lir.

## FIFA World Cup 2026: China aser India nung fans tem terata nung lir

**London, Monupii/May 08 (Agencies):** India aser China nung football fans million aika taküm FIFA World Cup ya pei linük nung repringtetsü asü masü ta terata tulu nung lir, kechiaser broadcasters temi tang tashi football ketdangsüba tentet tematiba, FIFA den tezüingzüktep yanglua mali.

Iba ama asayamung tulu tenzüksü hopta ishika lia TV rights deals kata maliba ya aiben majangshi. Iba amala tezüingzüktep ya asayamung tenzüksü ita aika mesüra küm agi jelia renema ayur.

Linük anaprong nung local media ajanga ashiba agi, FIFA aser broadcasters tem tang tashi iba asayamung sayutsü atema senotsü mechi atsüteptar.

FIFA-i BBC dang China aser India nung jembishinüba mapang lir aser tangbo temai madoktsüla, ta ashi, aser senotsü indang kecha mashi.

FIFA den territories 180-i tezüingzüktep yanglua renemogo, ta parnoki ashir.

Ajisüaka 2026 World Cup sayutsü temeden ya ano linük ishikati mongutet, aser yangji India aser China dena lir. Linük ana ya meyokteper nung alima nung nütsüing yongsük shilem asem shi lir.

Mezüingbo FIFA-i state broadcaster China Central Television (CCTV) nem iba asayamung sayutsü asoshi temeden ya sen \$300m (£220m) yong agütsü ta ashir.

FIFA-i tangbo jenjang ajema sen \$120m aser \$150m tsüingta nung meshir, ta sorkar aziüoka aliba osangkaket Beijing Daily ajanga ashi. Ajisüaka ibaji iba asayamung atema CCTV indang budget dang anasü agi tali lir, ta osangkaket ajanga ashi.

Iba asayamung atema China qualify mesütet asünungji, linük

nung football sapor tem iba asayamung repringtsü tejangraba kangabo malitsü südi, ta Beijing Daily-i ashi.

Iba osang kaket nungsa China aser North America tsüingta mapang nung tepila aliba indanga shia liasü, kechiaser asaya tajung aika China nunger fans asoshi anepdang züinglia lia asayatsü.

Tesüiba World Cups mapang China aser FIFA tsüingta tezüingzüktep ya kanga agi tekeraba nung yanglua liasü.

FIFA-i 2018 aser 2022 World Cups broadcast asütsü atema CCTV den exclusive agreement yangluogo ta November 2017 nung sangdonga liasü.

FIFA aser Indian broadcaster tsüingta tang tashi tezüingzüktep yanglua mali, saka tan hopta local media nungbo tezüingzüktep ka yakta sangdongtsü amai lir ta shia liasü.

## AFC U17 Asian Cup: India tsürtem quarter-finals tongogo

**Suzhou, Monupii/May 08 (Agencies):** India tsür temi Hokulbarnü Suzhou Taihu Football Sports Centre Pitch 8 nung AFC U17 Women's Asian Cup China 2026 indang Group B match tatembang Lebanon den asayaba nung 4-0 agi takok ngua iba asayamung quarter-finals tongogo.

Iba asaya nung India tsür Pritika Barman-i goal ana agütsü aser Alva Devi Senjam aser Joya nati goal ka-ka agüja liasü. Iba asaya akokba ajanga 2005 sülen tang mezüingbuba AFC U17 Women's Asian Cup nung India asoshi takok mezüingbuba aser mezüingbuba goals agütsüteta iba asayamung knockout stage asoshi tang mezüingbuba qualify asür.

Quarter-final nung India ya iba asayamung ayonger China den Suzhou Sports Centre Stadium nung Hombar nikongdang 5:00 ako nungi asayatsü. China ya Group A nung points toku bener tematiba jenjang nung liasü.

Iba asaya ya AFC Asian Cup YouTube Channel nung live stream asütsü. India ya 'third-placed teams' tajungtiba ana rongnung ka ama Thailand den quarter-finals atonger. Parnok group stage nung points asem bener goal difference -1 nung liasü, koba Group C nung Philippines (-13) dang kanga agi tajungba liasü.

Quarter-final nung takok angunungbo FIFA U17 Women's World Cup Morocco 2026 asoshi qualify asütsü.

Parnok teimla mesamatsü asoshi takok ka dang nüngdaka

liasü, aser India tsür taoba asaya nungi asayar ka dang melenshia Pearl Fernandes melen Anushka Kumari asayadaksü aser asaya tenzüker minute trok buba nung mezüingbuba goal agüja liasü.

Asaya tenzükli Pritika-i goal agütsüba ajanga parnok temulung ulushir tasü ita asaya.

Mapang talangka melie Anushka Kumari-i goal ka agütsütsü maongka angu, saka Lebanon tsür Marie-i kanga junga nokdangtet. Pritika ya Lebanon asoshi tebilemsü liasü aser lai minute 16 buba nunga tera agi goal ka magütsü, koba Lebanon goalkeeper-i ano maneni nokdanga liasü.

Minute 35 buba nung Alva Devi Senjam-i ayong-ayonga goal ka agüja mezüing half mapang 2-0 agi India jenjang tajungba nung liasü.

Second half tenzükdang India tsürtem kasa yimya nung asaya aser minute 72 buba nung Joya-i lar telok asoshi goal tasembuba agüja liasü.

Asaya tembangtsü minute pongu lia Pritika-i lar telok asoshi goal pezü buba agütsütet.

Iba asaya nung India U17 Women team nung asayartem Munni (GK), Elizabed Lakra (C) (Alena Devi Sarangthem 85?), Divyani Linda, Thandamoni Baskey (Bonifilia Shullai 75?), Julian Nongmaithem (Joya 58?), Anushka Kumari (Olivia Chanu Ningthoujam 75?), Ritu Badaik, Pritika Barman, Redima Devi Chingkhayam, Abhista Basnett, aser Alva Devi Senjam (Pearl Fernandes 75?) liasü.

## INDIA OSANG : Tapak 3 nungi...

### Bengal nung BJP nungi mezüingbuba...

Suwendu Adhikari ya tamalen TMC tongti aser Chief Minister, Mamata Banerjee den kanga atongtepa inyaker ka liasü, ajisüaka 2020 küm December ita nung pai TMC toktsür BJP nung aden. 2021 küm Nandigram menden nung pai Mamata madak takok ngua liasü aser tawa election nung pai Bhabanipur menden nungi takok angu.

BJP-i deputy chief minister ana shimtsüa akok ta osang angazüker. Tesüiba küm 20 nung Bengal nung deputy chief minister menden maliasü.

Deputy chief minister menden ana nungjagi kabo

tetsür- Agnimitra Paul shimtsüa akok aser kaji Shankar Ghosh shimtsüa akok. Union Home Minister Shah-i Kolkata nung Agnimitra Paul aser Shankar Ghosh naprongla den temeja senden menogo.

Honibarnü anüingdang 11:00 ako nung Kolkata yimti tiyong nung aliba Brigade Parade Grounds nung sorkar tenangzüka agiba sentong agitsü.

Iba sentong nung Ato kilonser Narendra Modi, Home Minister Amit Shah, BJP national Tir Nitin Nabin aser BJP-i yimsüsüba state tem nungi chief minister tem adentsü.

## BILEMDANGANG

"Nisung alidak teti temeim sayutsü lenmang lir."